

Ordnung auff dem

Meer oder Wasser/in Schiffen
zu halten:

Artickel der Schiff Ordnung.

Dieweil wir samptlich der Röm. Key. Mit. 2c. vnserm aller gnedigsten Herren/auff den Artickelsbrieff geschworen haben/ daß gleichen inhalts der Bestallung vns zu gebrauchen laßte/ es sey zu Wasser oder Land/vnd dem nach wir aber jetzt vora habens zu Schiff zu gehn/so erfordert die notturfft/das wir Schiffordnung dem alten gebrauch nach halten/als folgend zu vernemen sol werden.

Anfänglich So das wort Gottes verkündigt/od die Lektion der Meß gelesen wirdt/so soll menniglich darzu gehn/Gott den Allmechtigen nach altem löblichem gebrauch/vmb gut Wind vñ Wetter bitten/welcher aber das nicht thete ohne merckliche vrsachē/der sol nach erkantnuß des Hauptmans vnd Meistermanns gestrafft werden.

Item welcher/er sey hohes oder niderigs standts/Buren oder Büben/Gott oder sein Heiligen lestern würden/ es sey wenig oder viel/der oder dieselbigen sollen nach erkantnuß des Haupt/oder Meistermanns gestrafft werden.

Item welcher ein Wehr oder bloß Messer gegen dem andern bracht/der sol gleichßfalß nach erkantnuß der Obersten gestrafft werden.

Item welche auch nur mit Feusten oder sonst dergleichen einander schlugen/die sollen von dem Meistermann gestrafft werden.

Item es sol auch keiner dem andern auff's Land zuschlagen/oder balgen zusagen oder außbieten/welcher darwider handelt/der sol von dem Obersten vnd Meistermann darumb gestrafft werden.

Item wo man mit dem Segel/Ancker oder dergleichen/zu tag oder nacht wirdt etwas zuschaffen haben/ sol ein jeder den Schiffleuten weichen/vnd an irer arbeit nichts verhindern/welcher aber an solchem vngheorsam erschiene/der oder dieselben sollen nach erkantnuß des Obersten vnd Meistermanns gestrafft werden.

Item es sol auch sonst ein jeder die Schiffleut zu frieden lassen/so aber ein Schiffmann einem etwas thet/so sol es solcher dem es geschicht seinem Obersten anzeigen.

Item